

Osá Osirúami
mapurigá San Pablo oséli echi
TIMOTEO

Echi Pablo galá osé echi Timoteo

1 Nijé Pablo nimí osé, mápuni julárami níli Jesucristo Ra'íchala nawisánala, mapurigá Riosi Binói nakili. Nijeni julárami níli nawésanala si'néami pagótami mapurigá Riosi bichíwaga anili mapu si'néami pagótami mapu ikí bichííma Jesucristo niráa, ne sinibí niráa pirélama Riosi yuwa. ²Mujé Timoteo, nijé nimí je'ná jerigá osé, mápumi mapurigá nijé binói ranala niráa ju, mapu nijé nimí ne wabé galé. Nijeni ne wabé nakí mapu echi Riosi Onorúami mi wabé galigá natimama. Ayénachóni ne wabé nakí mapu Riosi Onorúami mi 'yama mapurigami ne galá kilí ologá bitélama. Ayénachóni ne wabé nakí mapu tamujé Walubélawala Jesucristo mi ayénachó echirigá 'yama.

Echi Pablo nulé echi Timoteo Jesucristo jiti nawisánala

³Mapalini 'nata mujé jiti, echalini ne walú natétara 'ya Riosi, echi mapu nijeni ne galá bichííga o'wiké, mapurigá nijé 'wénawala ayénachó o'wikeli echi Binói. Nijeni tarapé wi'nijírami niráa ju, nijé sulálachi niráa, mapujítini galá bichíí Riosi. Alí nijeni walú natétara 'ya Riosi mapujítini sinibí rawé we 'nata mujé jiti, sinibí rokogó ayénachó, mapalini tániga ra'ícha Riosi yuwa. ⁴Nijeni sinibí we 'nata mapurigami nalaka ukuénali chabé mapalí nijé nimí ariweli. Echijítini ne wabé nakí auchecho siné mi 'nénala, mapurigani auchecho ne wabé kanílama. ⁵Ne sinibí nijeni we 'nata mapurigami ne wabé galá bichíí, achigórigá mapurigá mujé su'ulá, Loira riwéami, ne bachá niráa bichííli, ayénachó mapurigá mujé iyela, Eunise riwéami, ayénachó galá bichííli. Alí nijeni galá machí mapurigá mujemi ayénachó ne galá bichííli.

⁶Echijiti nijé nimí ané mapu we galá níima mápumi auchecho siné we nílama Riosi nóchala olayá, mapurigami we nílaka olali ch-abé chokichí mapalimi bachá niráa julárami níli Riosi Ra'íchala nawisánala, mapalí nijé nimí echijiti wilali mapalini moba mujé mo'ólachi nocháli nijé sikala. ⁷Mapujiti Riosi ketasi tamujé tamí 'yali mapurigata ne wabé majabo. Chopi Riosi tamujé tamí wabé jiwéralali Binói Iwigala jiti, mapurigata wabé galéami níibo, ayénachó mapurigata ketasi chuwé olabo. ⁸Echijiti ke siné riweli tamujé Walubélawala Jesucristo jiti nawésiya. Nirapé cho riweli tamí jiti, chopi mapujiti nijeni pachá bachárami ju mapujítini bichíí Jesucristo niráa. Si'winárigá sinibí we galá anácha mapalimi arigá echijiti risúu olárami ju mapujítimi nawésa Riosi Ra'íchala, mapurigá Riosi Binói sinibí

mi galá jiwérata mapurigami echirigá galá anachama. ⁹A'lí Riosi tamujé tamí ku wikáwali mapurigata chati sitíi olali. A'lí Binói tamujé tamí bayeli mapurigata ne galabé ologá pirélabo mapurigá Binói nakí. Chopi Riosi ketasi echirigá olali chopi mapujiti tamujé, siné káachi, ne galabé oláami níili. Echali Riosi chopi tamujé tamí echirigá bayeli mapujiti Binói echirigá nakili olánala, mapujiti Binói tamujé tamí wabé galeli máputa bichíibo riwéali Jesucristo niráa. A'lí Riosi arigá tamujé tamí ne wabé galeli ki'yá chokichí jonsa mapalí je'ná kawí ketasi cho niwárami níili. ¹⁰Chopi jipi Riosi tamujé tamí galá machírali mapurigá Binói tamujé tamí ne wabé galé, mapujiti Binói ma ku'wíramiya júuli echi tamujé Walubélawala Jesucristo jena'í wichimóbachi. Echi Walubela Jesucristo tamujé tamí ku Wikáwami ju. A'lí Jesucristo wabé omériga olali mapurigá echi mukuwáwami ma ketasi tamujé tamí omérama. Ayénachó Binói tamujé tamí galá machírali mapurigata oméramo sinibí niráa piréliya Riosi yuwa, ata galá bichíisagá echi wabé Galabé Riosi Ra'íchala.

¹¹A'lí echi Walubela Riosi tamí wilali mapurigani nawésami níima je'ná Galabé Ra'íchali. Ayénachó Riosi tamí júuli mapurigani nawésaga binérama echi jaré pagótami mapu ketasi Juríosi ju. ¹²Echijiti nijeni risúu olárami ju jena'í pachá bachárami niráa, chopi nijeni ketasi riwela mapujítini galá machí Chigá nijeni galá bichíi. Ayénachó nijeni galá bichíi mapu echi Walubela Jesucristo ne wabé omérami ju tamí tibútiya echali ne jubá rawé yénasi.

¹³Ne galá bichiwi mujé Timoteo achigórigá mapurigá nijé nimí binérali echi wabé Galabé Riosi Ra'íchala. Sinibí galá bichíiga olá. Ayénachó ne wabé galéami nili mapujiti Jesucristo sinibí tamujé tamí 'ya máputa we galéami níibo mapalita galá bichíi Binói niráa. ¹⁴Echi Walubela Riosi ma mí galá 'yali mapurigami omérama nawésiya Binói Ra'íchala. Sinibí ne galá tibuta echi wabé galabéala mapu Riosi mí ma galá 'yali. A'lí echi wabé Galabé Riosi Iwigala mapu pachana tamujé yuwa bité, Échiko sinibí mi ku'wírama.

¹⁵Mujemi ma galá machí mapurigá si'néami echi jaré ritémntami echo'ná Ásiachi anilíwachi kawírali piréami, ma tamí ariweli. A'lí echi auché jaré yuwa, echi Jijelo riwéami rijói ayénachó tamí ariweli, echi Emójene riwéami rijói ayénachó. ¹⁶Nijeni wabé nakí mapu echi Walubela Riosi ne galá natimama si'néami mapu ikí echo'ná echi Onesíjoro riwéami rijói bitélachi piréami ju, mapujiti echi rijói wisabé tamí iwébanali sulachí niráa, mapalini jena'í pachá bachárami níili, ayénachó binói ketasi riwéali mapujítini pachá bachárami níili. ¹⁷Chopi si'winárigá mapalí echi Onesíjoro jena'í Rómachi asali, echali binói 'wérali ologá, tamí áli, mapuyénasí binói galá tamí riwali. ¹⁸Nijeni ne wabé nakí mapu echi Walubela Jesucristo ne galá natimama echi Onesíjoro, mapurigá binói ne galá ku'wíratami níima echali ne jubá rawé. Mujé Timoteo, galá machí mapurigá echi Onesíjoro tamujé tamí ne wabé ku'wírali chabénala mapalí tamujeta echo'ná Ejésochi muchili.

**Echi Timoteo nulérami níili galabé olánala mapurigá bilé
galabé oláami sontarsi, Jesucristo sontársawala**

2 Mujé Timoteo mapurigá nijé binói ranala niráa jumi. Ne wabé galéami nili sulachí niráa, achigórigá mapurigata ne wabé galérami ju mapujítita napawíkami ju Jesucristo yuwa. ²A'lí achigórigá mapurigami galá kipuli tamí nawésachi Riosi Ra'íchala, echi jaré wikabé pagótami, jipi echirigá ayénachó

nawísánala julá auché jaré bichíwaga oláami ritémntami mapu mujemi mayé ne bichíwali omérama nawésiya auché jaré pagótami.

³A'lí galá n'fima mapu mujemi galá anachama mapalimi risúu olárami ju mapujítimi nawésa Jesucristo jiti rugá. Echirigá ne galá anachá, mapurigá bilé galabé oláami sontarsi, Jesucristo sontársawala niráa. ⁴A'lí ke wesi sontarsi wabé nílaka nocha auché jaré si'nú nóchali olayá. Si'winárigá ne si'néami echi jaré sontarsi chopi galá nijéwaga olá mapurigá sontarsi niráa, achigórigá mapurigá aboni walúlawala nakí. ⁵Echirigá achigórigá echi mapu ralajípako chopi galá mé mapalí binói ne sébali galá ologá 'mawá mapurigá nulérami n'fili. ⁶Ayénachó galá n'fima echalí 'wíwachi mapu echi mapu icháliko ne bachá naresa binói n'wala 'wíwami. ⁷Ne galá 'natá mujé Timoteo mapurigá nijeni mí je'ná jerigá aneli. A'lí echi Walubela Jesucristo mí galá machírama ne suwaba.

⁸Sinibí galá 'natá echi Walubela Jesucristo jiti, echi mapu echi walula silfami Rabiri riwéami kúchala kúchuwala niráa n'fili, echi mapu auchecho ku owínali mapalí ma mukúami n'fili. Nijeni sinibí je'ná jerigá ruwigá nawésa, mapalini nawésa Riosi Ra'fchala, mapurigá echi jaré pagótami ku wikáwarami n'fima. ⁹Echijiti mapalini risúu olárami ju mapujítini nawésa je'ná Galabé Riosi Ra'fchala, echalini sinibí galá anácha. Ayénachó nijeni abijí galá anácha mapalini bulérami ju bilé jiero wiya jiti, mapurigá bilé wabé chati sitíí oláami niráa. Chopi echi Galabé Riosi Ra'fchala tarapé mapurigá bulérami niráa ju, echi jiero wiya jiti, mapujiti si'néami pagótami mapu ikí bichíimako ne galá ku wikáwarami n'fima. ¹⁰Ayénachó nijeni echijiti arigá anácha mapalí nijeni risúu olárami ju, mapujítini we galé echi jaré mapu ikí Riosi ma chapili mapurigá aboni ku wikáwarami n'fima Jesucristo jiti. A'lí Riosi ayénachó chapili aboni mapurigá aboni ne wabé o'wéalatami n'fima, ayénachó mapurigá aboni sinibí niráa wabé kanflaga ku pirélama echo'ná ripá riwigachi. A'lí si'néami tamujé bichíyami echirigá 'yárami níibo mapujítita galá bichíí Jesucristo niráa.

¹¹Je'ná ra'fchali ne bichíwali ju:

A tamujeta ma ko'wirúami niráa n'fisaagá mapujítita bichíí Jesucristo niráa, a'lí tamujeta ayénachó auchecho siné ku pirélabo Binói yuwa.

¹²A tamujeta risúu olárami n'fisaagá mapujítita bichíí Jesucristo niráa, ayénachóta Binói yuwa jawárami níibo mapurigá o'wéala niráa, mapujiti Jesucristo Binói ne wabé Walubela Silfami ju.

Chopi ata jeansisáagá máputa ketasi machí Binói Jesucristo, echalí Binói ayénachó jeanimea mapu Binói ketasi cho tamujé tamí machí.

¹³Chopi a tamujeta ketasi galá bichíisasagá, echalí echi Walubela Jesucristo arigá sinibí niráa ne wabé bichíwaga oláami n'fima, mapujiti Riosi sinibí wabé bichíwaga oláami ju.

A'lí Riosi ketasi omero Binói niráa 'yékkaka aniyá.

**Echi Pablo nakili mapu echi Timoteo bilé wabé galá
oláami nóchami n'fima Jesucristo nóchala olayá**

¹⁴Mujé Timoteo je'ná jerigá ne galá machili echi auché jaré pagótami. Ayénachó ne galá ruyé mapurigá aboni ketasi wikabé ra'fchaga a'nagupi na'áwama. Je'ná a'nagupi na'áwaga ra'ichálawami tarapé galá ju. Siné káachi echi auché jaré mapu ikí nami echirigá ra'ichálawami sití cho 'natama. ¹⁵Ne wabé 'wérali

olá mujé Timoteo mapurigá Riosi nakí mápumi olama, Binói nóchala olayá, mapurigami ketásirapé riwélama, chopi mapurigami galá machimea nawésiya echi ne bichíwali Galabé Riosi Ra'íchala. ¹⁶Ke siné chuwé ra'íchá mujé, mapurigá auché jaré jena'í wichimóbachi piréami we ra'ícha, mapujiti echi jaré pagótami echirigá ra'íchaga chopi waminabi ne wabé chati sitíi olásimi. ¹⁷A'lí aboni binélawala wabé chati sitíi olila echi auché jaré pagótami, mapurigá biléana wabé chati cháanami niráa, mapo'ná waminabi ne wabé cháansimi. A'lí echi Imeneo riwéami rijói echirigá we binera, echi Jileto riwéami ayénachó. ¹⁸Aboni ma ariweli echi ne bichíwali, mapujiti aboni we binéraga nawésa jeanigá mapu echi jaré suwíami ketasi auchecho siné ku o'wínama. A'lí aboni echirigá nawésaga, chopi olá mapurigá auché jaré ma ketasi waminabi bichíma echi ne Bichíwali. ¹⁹Ne wabé bichíwali ju echi Galabé Riosi Ra'íchala. A'lí echo'ná Riosi Ra'íchala oselíwalachi je'ná jerigá osirúami ju: Echi Walubela Riosi galá machí mapu chigá ju Binói níwala pagótami. Ayénachó je'ná jerigá osirúami ju: Waminá ariwesi chati sitíi olayá, ne si'néami 'yemi máputamo Jesucristo níwala ju.

²⁰Mapujiti echo'ná biléana walubé kalírali nirúlama jaré bitoli echi wabé natéami oro jiti niwárami, ayénachó nirúlama jaré bitoli, plata jiti niwárami. A'lí echo'ná ayénachó nirúlama jaré kusí niwárami bitoli, ayénachó nirúlama jaré wicholí niwárami bitoli. A'lí jaré echi bitoli ro'wárami níma echi we galabéala namuti, chopi auché jaré ro'wárami níma echi wabé sitíala namuti. ²¹A'lí a bilé rijimala nakisáagá mapu binói galá nirárami níma, echi Walubela Jesucristo jiti, ne galabé oláami niráa Riosi nóchala olayá, echalí arigá 'wérali ju galá bi'wíami niráa bitélasa mapurigá Riosi nakí, ketasi chati sitíi oláami niráa. Echalí echiyiri rijimala mapurigá bilé bitoli ne wabé galabéala ro'wárami niráa níma. A'lí echiyiri rijimala galá omérama olayá suwaba galabé oluwáwami. ²²Ketasi chuwé chati sitíi ologá biteli, ketasi mapurigá jaré ri'malí olá. Chopi sinibí galá wachínaga ologá biteli. Sinibí waminabi galá bichíyami nílaka Riosi. Ne wabé galéami nili. Ayénachó sinibí galá kilí ologá biteli mapurigá sinibí olá echi jaré mapu ikí galá bi'wíami suléami juko, echi jaré mapu sinibí tániga ra'ícha echi Walubela Riosi yuwa. ²³Ketasi nijewi mujé mapalí auché jaré a'nagupi ra'ícha mapurigá ke newalite niráa, mapujítimi galá machí mapu echirigá ologá, aboni chopi waminabi na'áwaga nakichima a'nagupi. ²⁴A'lí ketasi galá níma echirigá wabé yoka inasa mujé, mapujítimi echi Walubela Riosi piónawala niráa ju. Si'winárigá galá níma mápumi ne wabé galéami níma, si'néami echi auché jaré pagótami. Ayénachó galá níma mápumi galabé binériami níma Riosi Ra'íchala, ayénachó mápumi galá anáchami níma mapalí auché jaré mi wabé kumé. ²⁵Galá níma mápumi kilí ologá ruyema echi jaré mapu wabé sayérami ju Riosi Ra'íchala, mapurigá aboni ma ketasi echirigá olama. A'lí siné káachi pe waminana Riosi galá bichíiratama aboni, mapurigá auchecho ku ro'wiga, aboni galá bichíma echi ne Bichíwali. ²⁶Echalí aboni galá ku 'natama. A'lí aboni echijiti auchecho ku botonárami niráa níma, mapujiti jipi aboni mapurigá bulirúami niráa ju, echi riablo jiti. A'lí echi riablo chopi olá aboni yuwa, mapurigá binói nakí olánala.

**Echalí ne jubá rawé jena'í wichimóbachí piréami
pagótami ne wabé chati sitíí oláami níima**

3 Ayénachó galá níima mapu mujé Timoteo galá machimea mapu echalí wabé waminánomí rawé si'néami mapu ikí galá bichíiko Riosi ne wabé risúu olárami níima. ²Mapujiti echi auché jaré ke bichíyami pagótami chopi a aboni niráa galéami níima. Aboni ne wabé korúkami níima echi wenomí. Ayénachó aboni ne wabé o'wéalatama a aboni niráa. A'lí aboni ne wabé nóchami níima. Ayénachó aboni ne wabé sayéraga ra'íchama Riosi. Ayénachó aboni ketasi nijéwami níima aboni 'wénawala. A'lí aboni ketasi nakimea natétara ayá. A'lí aboni ketasi galá niráma echi bichíilawami mapurigá auché jaré pagótami ne galá bichíima. ³Echalí wabé waminánomí rawé echi jaré ke bichíyami pagótami ketásirapé galéami níima. Aboni ketasi ku wikáwama echi jaré aboni sayela. A'lí aboni ne wabé sitíí ra'íchami níima. Ayénachó aboni wabé jobátami níima. A'lí aboni ne wabé sayérami níima suwaba galabé oluwáwami. ⁴Echalí rawé echi jaré ke bichíyami pagótami a'nagupi wi'nijíami níima, ayénachó aboni chuwé ke 'nátaga oláami níima, ayénachó echi jaré ke bichíyami pagótami, aboni niráa, ne bachá o'wéala niráa mayema. A'lí aboni ne wabé nakimea olánala mapurigá aboni kaníлага olá, chopi aboni ketasi nakimea bichíinala Riosi. ⁵A'lí echi jaré ke bichíyami pagótami arigá ne wabé amachíami níima, chopi aboni ketasi machimea mapu Riosi ne wabé omérami ju galabéala ku niwayá echi pagótami.

Chopi mujé Timoteo, ketasi siné yuwa iná echiyiri pagótami. ⁶Mapujiti jaré je'ná jeyiri rijói echo'ná jaréana kalírali mo'wisáa, ne wabé 'yéka ané echi jaré ne wabé chati sitíí oláami muguí, ke newalite, echo'ná piréami. ⁷A'lí je'ná jeyiri muguí sinibí niráa we bineka kipugú, chopi aboni ketasi galá omero machiyá echi ne Bichíwali. ⁸Chabé ki'yá echi okuá rijói sukurúami, echi Jánési riwéami, echi Jámberesi riwéami yuwa, ne wabé sayérali echi walula Moisesi mapu Riosi jiti julárami níili. Jipi rawé echi jaré chati sitíí oláami rijói echirigá achigórigá ne wabé sayérami ju echi ne Bichíwali. Ayénachó aboni ne wabé chati 'nátami ju, tarapé bichíyami Riosi niráa. ⁹Chopi echi jaré chati sitíí oláami rijói arigá ketasi omérama olayá mapurigá wabé wikabé auché jaré ayénachó ketasi bichíima Riosi niráa, mapujiti ne si'néami echi auché jaré pagótami ne galá machíratami níima mapu echi jaré chati sitíí oláami rijói ke newalite ju, achigórigá mapurigá echi Jánési, echi Jámberesi ayénachó machirúami níili mapurigá ke newalite niráa.

Ne jubáami niráa, echi Pablo ruyeli echi Timoteo mapu ne wabé galabé olama

¹⁰Chopi mujé Timoteo ne galá nijéwaga olali mapurigá nijeni nawésaga binérali. Ayénachómi galá ologá bitéali mapurigá nijeni olali. Mujemi sinibí galabé olánali achigórigá mapurigá nijeni galabé olali. Ayénachómi galá bichíili mapurigá nijeni bichíi. Ayénachómi kilí ologá binérali echi auché jaré achigórigá mapurigá nijeni olali. Ayénachómi galá galéami níili mapurigá nijeni wabé galéami níili. Ayénachómi galá anáchali ¹¹mapalimi risúu ologá a'najátarami níili, ayénachó mapalimi ne wabé risúu olárami níili echi auché jaré ke bichíyami pagótami jiti. A'lí mujemi ma galá machí mapurigá nijeni ikili echo'ná Antiokíachi, echo'ná Ikóniachi ayénachó, echo'ná Lístrachi asíchiko, mapuriganí ne wabé risúu ologá a'najátarami níili, chopi echi Walubela Jesucristo sinibí tamí galá ku'wírali. ¹²A'lí ne si'néami echi jaré

bichíyami pagótami mapu ikí sinibí nakiko chopi galabé ologá pirélanala mapurigá Jesucristo nakí, abóniko arigá kichiga a'najátarami níma. ¹³Chopi echi auché jaré chati sitíí oláami pagótami, echi jaré wabé 'yékami ayénachó, si'néami waminabi nokuúsama waminabi ne wabé chati sitíí olayá, ne wabé 'yéka echi auché jaré pagótami, ayénachó wabé 'yékarami nílasagá echi auché jaré jiti.

¹⁴Chopi waminabi galá bichíwi mujé Timoteo, mapurigami ma galá bineli Riosi Ra'íchala, mapujítimi galá machí mapu Riosi Ra'íchala ne bichíwali ju. Ayénachómi galá machí mapu chigá mi binérali echi Galabé Riosi Ra'íchala. ¹⁵Galá 'natá mapurigami táaka jonsa galá machili echi We Galabé Riosi Ra'íchala osirúami, echi mapu ne wabé omérami ju galá machíriya echi jaré pagótami, mapurigá aboni galá ku wikáwarami níma mapalí aboni galá bichíima Jesucristo niráa. ¹⁶Chabé ki'yá Riosi galá 'natárali jaré galabé oláami rijói mapurigá aboni osimea Riosi Ra'íchala achigórigá mapurigá Riosi Binói binérali aboni osayá. Echijiti ne suwaba Riosi Ra'íchala osirúami wabé galá ju tamujé tamí ne wabé galabé niráa binériya. Ayénachó Riosi Ra'íchala tamujé tamí oyérami ju mapalita ketasi galá bichíí. Ayénachó Riosi Ra'íchala tamujé tamí galá ruyé mapurigata ketasi waminabi chati sitíí olabo. Alí Riosi Ra'íchala ayénachó galá binera echi jaré Riosi níwala pagótami mapurigá aboni omérama ne galá wachínaga ologá piréliya, ¹⁷mapurigá si'néami Riosi níwala pagótami galá omérama olayá karúmati galabé oluwáwami.

4 Waminánomí rawé echi Walubela Jesucristo ne wabé Walubela niráa ku nawama, justicia olámiya ne si'néami pagótami yuwa mapu ikí abijí piréami níma jena'í wichimóbachi, ayénachó ne si'néami echi jaré mapu ma suwíami níma. Alí echi Binói Walubela Jesucristo galá machí mapurigani aní, ayénachó Riosi Onorúami galá machí mapurigani aní mapalini ne wabé mi nulé ²mapurigami galá nawisama echi Galabé Riosi Ra'íchala. Ne sinibí galá bichíuga nawesi mapalí galá nílatirikó, ayénachó mapalí ketasi galá nílatirikó. Ne galá machili echi jaré pagótami mapu aboni chati sitíí oláami ju. Ayénachó galá nawésaga oyeli echi jaré chati sitíí oláami. Alí galá nawésaga ruyé echi jaré bichíyami, sinibí ne galá kilí niráa binéraga echi jaré aboni. ³Mapujiti pe waminánomí rawé jena'í wichimóbachi piréami pagótami ketasi risensia 'yama mapurigá aboni waminabi nawésarami níma echi Galabé Riosi Ra'íchala. Si'winárigá aboni chopi nakimea jaré pagótami ra'íchala námanala, mapurigá aboni chopi chuwé niráa 'nata. Echalí echi jaré pagótami chopi bayema echi jaré nawésami mapu ikí echirigá nawésaga, risensia 'yama mapurigá echi pagótami olama mapurigá aboni chopi nakimea olánala. ⁴Echalí echi jaré pagótami ma ketasi nakimea kipúnala echi ne Bichíwali. Chopi aboni ne wabé nakimea echi pagótami irétawala kipúnala. ⁵Chopi mujé Timoteo, sinibí ne galabé wachínaga 'natá. Sinibí galá anachá mapalimi risúu olárami ju. Sinibí galá nawesá echi Galabé Riosi Ra'íchala. Ne sébali galabé olá mapurigá Riosi mi nuleli.

⁶Mapujiti ke 'me ayó nijeni ma mi'lirúami níma mapujítini bichíyami ju Jesucristo niráa. Ma ne mulubé ju mapalini mi'lirúami níma. ⁷Mani ne sébali galá níkwali suwaba chati sitíí oluwáwami sayéraga. Mani ne sébali suwaba sunili nawésa Riosi Ra'íchala mapurigá bilé 'máami ma galá suní. Ne sinibí nijeni galá bichíili Riosi. ⁸Echijiti nijeni arigá narema echi ne wabé galabéala, echi mapu echi Walubela Jesucristo tamí 'yama echalí ne jubá rawé, mapujítini galá wachínaga ologá bitéali. Alí echi Walubela Jesucristo sinibí ne galabé justicia oláami ju. Alí Binói ketasi

chopi tamí 'yama echi galabéala, chopi ayénachó 'yama ne si'néami echi jaré mapu ikí wabé galigá buweko mapu Binói ku nawama jena'í wichimóbachi.

Echi Pablo galá ruyé echi Timoteo

⁹Mujé Timoteo 'wérali olá we yáati wakiná siminala tamí 'némiya. ¹⁰Mapujiti echi Rémasi riwéami rijimala ma tamí ariweli. Binói ne wabé simírami galeli echi jaré jena'í wichimóbachi nirúami namuti. Echijiti binói echo'ná Tesalónachi anilíwachi walúlachi simili. A'lí echi Kresente riwéami rijimala simili echo'ná Galákiachi anilíwachi kawírali. A'lí echi Tito echo'ná Ralmásiachi anilíwachi kawírali simili. ¹¹Chopi echi Lúkasi bi'neli tamí yuwa atí. Wakiná bayera echi Márkosi mapalimi wakiná simea, mapujiti binói galá omérama tamí ku'wíríya, Riosi nóchala olayá. ¹²A'lí echo'ná Ejésochi júulini echi Tíkiko. ¹³Wakiná to echi nijé nówala wi'lí napacha mapalimi wakiná simea. Nijeni ariweli echo'ná Tróachi anilíwachi, echo'ná echi Karpo riwéami rijimala bitélachi. Ayénachó wakiná to echi jaré nijé nówala oselí. Chopi bachá niráa to echi jaré wichí osirúami. ¹⁴Echi Alejanto mapu jiero michoka niwáami ju karúmati, échiko tamí wabé sayérali. Echi Walubela Jesucristo ku natétama echi rijói, achigórigá mapurigá binói olali. ¹⁵Mujé Timoteo ayénachó a mujé binói niráa ne galá tibuní echi rijói jiti, mapujiti échiko chabé jonsa ne wabé sayérali mapu tamujeta nawésa.

¹⁶A'lí chabénala mapalí nijeni bachá niráa ni'yúraga ra'fchali bacháami echi jaré igúsuwami yuwa mapujiti aboni tamí wi'nijili, echalí ke wesi echi auché jaré ritétami tamí ku'wírali, chopi ne si'néami tamí waminá bi'neli ariweli. Jipi nijeni ketasi nakí mapu Riosi echijiti waminabi wi'nijima aboni. ¹⁷Chopi echalí echi Walubela Jesucristo arigá tamí ne wabé ku'wírali. A'lí Binói tamí jiwératáli mapurigani ne sébali nawésama echi galabé Riosi Ra'fchala, mapurigá ne si'néami echi auché jaré isena pagótami ayénachó galá kipuma. Echalí echi Walubela Jesucristo echirigá tamí ku'wírali mapurigani ketasi suwábarami níima mapurigá bilé wabé aparúami mawiyá wabé suwaba. ¹⁸Ayénachó echi Walubela Jesucristo sinibí tamí ku'wírama mapurigá echi wabé chati sitíi oluwáwami ketasi tamí omérama. Ayénachó Binói tamí tibútama mapurigani sebama echo'ná ripá riwigachi mapo'ná Binói we nulá mapurigá Walubela niráa. Galá níima mapu echi Walubela Jesucristo waminabi walubéлага anérami níisa sinibí niráa, ne sinibí. ¡Echirigá níima!

Echi Pablo ripóraga nówala auché jaré ritémtami

¹⁹Mujé Timoteo galá ripori echi Priska riwéami mukí, echi binói kunala, Akila riwéami ayénachó. A'lí ayénachó galá ripori si'néami mapu ikí piré echo'ná echi Onesíjoro riwéami rijói bitélachi. ²⁰Echi Erasto riwéami rijimala echo'ná Koríntochi aripili. A'lí echo'ná Milétochi ariwélini echi rijimala Trójimo riwéami mapujiti binói nayúami níili. ²¹Mujé Timoteo we sapú wakiná simí, ke cho romó níliachi. Echi rijimala Eúbulo riwéami ayénachó mi ripora, echi Purénsia riwéami ayénachó, echi Lino riwéami ayénachó, echi Kalária riwéami mukí aschiko. Ne si'néami echi auché jaré ritémtami ayénachó mi galá ripora.

²²Nijeni nakí mapurigá echi Walubela Jesucristo mi yuwa asimea. Ayénachó mapurigá Riosi si'néami 'yemi mi ne wabé ku'wírama. ¡Echirigá níima!